

Gui'ch barojp guxhaal San Pabl loj Timoteo

Rugajpdioz Pab Timoteo

1 Naj Pab, najn tijb xi apóstol Jesucrist, Dios gule naj din gatiechan diidx por promejs ni beenman guial gudëédaman guialnaban tiblyaa loj ree bën rlliladx Jesucrist. ²Naj caxhal gui'ch guie par lüj Timoteo bën rënan zi'c da xi'nän. Dux Dad ree Dios con Dad Jesucrist güünle' lüj, yayaman lüj, yabe'cdxe tëëman luxdool.

Guialrulüü xcwent Jesucrist

³Dxej guiaal chi rbedx rniaaban Dios, rusaaladxan lüj, abi' rudën quixtëë loj Dios, bën rünan sirv con guidib luxdon zi'c been ree da bengol gulalan been reeman laaman sirv. ⁴Chi rusaaladxan ni biinl, ma rën nejzdoon guguiän lüj din yayu luxdon zagdxe. ⁵Yu'guican guial lüj diidxil rlliladxil Jesucrist, yaløj xnaxüjsil Loida con xniaal Eunice bililadx laaman zian, zeel ragbeeçaawan guial ziangajc rlliladxil laaman.

⁶Zeel rnin lojl, been naguiejn din guiguien quiarguiejn ni baneé Dios lojl chi badxib yan guijquil. ⁷Din ad baneet Dios xSprijtaman

duloj ree par yadxeb ree, baneé xSprijtaman par yadxu'dxi'ch ree, par yayën du lasa' ree, në par yaya'p ree tijb quiarguiejn zagdxe. ⁸Zeel ad yatul guinieel xtiidx Dad Jesucrist, ad yatu nëtëël naj yu'n ladxguiib por laaman, con xyudar Dios gudaan guialzi ni rayal tëdil guial guitie'chil xtiidxza'c Jesucrist. ⁹Din Dios ma beenman perdon dux tol ree abi' ma gulejman dunuj ree din yabajn ree zi'c rënman, ad por ni baguient ree, diizd chi gad guidxliuj gacçaaw beenman xgab guial por Jesucrist gulüüman dunuj ree xhienaag rënman dunuj ree. ¹⁰Yan bi't Jesucrist bën güit por dux tol ree, rayagbee ree guial diidxli rën Dios dunuj ree. Abi' Jesucrist naj bën biquied guialrniabee loj guialgüjt abi' zian biguien guial yu' guialnaban, guialnaban tiblyaa par ree bën rlliladx xtiidxaman. ¹¹Zeel gulej Dios naj din gacan xi apóstol Jesucrist, din ganen xtiidxaman gulü tëën laan bën ad najt ree bën Israel, ¹²abi' por zian cadëédan guialzi ni cadëédan. Per ad ratutan por zian, din naj ragbee chu rlliladxan, abi' ragbeen guial laaman rajp guialrniabee par

cu'chaawaman ni basa'nan lojman
xt dxej ni gui'taman stijb.

¹³Badxe'guijc binal tēē ree
diidza'c ni ma balün lüj, tant zi'c
rliladxil Dios nē zi'c rēn ree lasa'l
guial ma nayajc ree tijbzi con
Jesucrist. ¹⁴Abi' con xyudar xSprijt
Dios bēn naban con dunuj ree, gojp
ni baneē Dios güünl.

¹⁵Lüj ragbee guial gra ree
bēn zojb niz Asia ma gulēladx
reeman naj, loj reeman no'ch
Figelo con Hermógenes. ¹⁶Dios
gagnē ree xfamil Onesíforo, din
laaman dād zien volt bagu'man
luxdon. Abi' ad batunētaman naj
yu'n ladxguiib, ¹⁷naabzi bi'taman
Rom baguuilaman naj xt lodzi
badxejlaman naj. ¹⁸Abi' lüj ragbee
guial dād beenman dunuj ree
yudar chi badxu' ree Éfeso. Xi nix
chi gui't Dad Jesucrist stijb, yaya
da'taman laaman.

Zi'c tijb xsuldad Jesucrist

2 Gui'áad lüj xi'ngaan,
guzujdxi'ch loj yudar ni raya'p
ree por Jesucrist. ²Abi' ni biguiejnl
rēn delant loj zien ree bejn, balüün
loj ree bēn diidxli rliladx, bēn ni
zajc gulüü ree ben ren.

³Zi'c tijb suldadza'c, zian gudaan
ree guialzi, zi'c najl xbejn Jesucrist.
⁴Ni'qui tijb bēn naj suldad ad rut
loj ni ad najt xcwent ree suldad par
chile' yaya'nman zagdxe loj bēn
rniabee laaman. ⁵Ziangajc bēn ni
rguijt xhie tijb nin, rayal quitaman
xnejz din chile' tia'man prem. ⁶Abi'
bēn rüjn dxiin dajn, yaløj xgaj rüjn
da'taman dxiin din gac yaca'man
guialnaza'c. ⁷Been xgab ni canin
lojl, abi' Dad Jesucrist gagnē lüj din

chignia'l gra. ⁸Basaaladx Jesucrist,
bēn güt abi' babanman, bēn
zēēd loj xdiaa rey Davi, zian naj
xtiidxza'caman ni catiechan. ⁹Abi'
por zian cadēēdan guialzi, xt naxiin
lēn ladxguiib zi'c tijb benmal, per
xtiidx Dios ad naxiitan. ¹⁰Zianan
zeel rdaanan gra par günan yudar
bēn ni ma naj ree par Dios, din gap
reeman perdon por Jesucrist yayal
tēē reeman guialnaban za'cdxoon
ni naj par tiblyaya.

¹¹Waliqui ree diidx ni rēb:

Bal ma bayējt ree con laaman,
ziangajc yabajn ree con laaman.

¹²Bal radaan ree xhietēēz ni raza'c
ree,

ziangajc yanabee ree con
laaman.

Bal raguie'ch ree guial ad
naguieenbeet reeman,
ziangajc guiēbaman guial ad
nünbeetaman dunuj ree.

¹³Bal id raguieen ree cumplid dux
tiidx ree,

per laaman rüjn cumplid
xtiidxaman

din ad zajct guidxaa zi'c najman.

Tijb bēn raya'n zagdxe con xchiin

¹⁴Güjdx loj ree bejn din gusaaladx
reeman ni guie ree, abi' por Dios
güjdx loj reeman guial ad rdildiidx
reeman por ree ni ad rüjnt yudar,
ruxhiinzan bēn ni riguijnl ree
laan. ¹⁵Been xt lod chile' güünl
din yaya'nl zagdxe loj Dios, din
chibiguil lojman zi'c tijb bēn ni rüjn
dxiin abi' achet ni gustu laaman,
guial cayüjnl xnejz con xtiidx Dios.
¹⁶Ad gül diidx ni ad rüjnt sirv, ni
ad rüjnt yudar bejn ree. Din bēn
rüjn ree zian zi'cri zinal reeman

nejz mal, ¹⁷abi' xtiidx reeman naj zi'c tijb guialguijdx ni rigaa. Lasa' ree bèn guin naj Himeneo con Fileto, ¹⁸din ad zinaltri reeman zi'c naj xtiidx Dios. Rëb reeman guial xcwent guial yaban ree bengüt mal gudëd gojc zian, abi' rüjndxa reeman xguialrliladx tio'p choon ree bejn. ¹⁹Per xtiidx Dios ad zajct guidxaan zi'c tijb guiay ni zojbdxi'ch. Abi' loj xtiidx Dios rëb: “Dios nünbee bèn naj ree xbejnman”, rëb tëë loj xtiidxaman: “Graczi ree bèn rëb guial nünbee reeman Dios rayal gusa'n reeman gra ni mal.”

²⁰Lën tijb yu narooob, ad ganaxt ree ni or yu' o ni plajt, nëgajc ree ni goc con yag në con bajn yu'. Din yu' reen rüjn sirv guixie guixie, yu' tëë reen ma naj dxej rüjn reen sirv. ²¹Yan ziangajc bèn ni rüjn naguiejn guiban naya, laaman naj zi'c ni rüjn sirv chi rajc xhienin, laaman ma naj xbejn Dad Jesucrist në ni güün sirv par laaman, din za'man par güünman gra ni naj zagdxe.

²²Zeel basa'n xixgab xinguiag, xgab ni ad rüjnt sirv, gubajn xnejz. Binal guialrliladx, guialrën lasa' në guial yabedxe luxdoo con los demasri ree bèn ni con guidib luxdoo rbejdx rniab Dad Jesucrist. ²³Ad tildiidxil por tijb ni ad züjntil gan, o por tijb ni ad lasajct par tildiidxil, din lüj ragbee guial por zian rzuloj wadijl. ²⁴Abi' tijb bèn ni rüjn sirv Dad Jesucrist ad rayalt gacaman bèn ruladx wadijl, rayal gacaman benza'c con chutëëz, rayal gacaman tijb bèn ni gac gulüü ree bejn, gacaman bèn pacens ²⁵guzuxnejz tëëman con ree diidxzagdxe bèn ni rüjn ree xcontr

ni naj diidxli. Abi' rupent zian güün Dios guial yayüjn reeman xgab din gagbee reeman ni naj diidxli. ²⁶Par laa reeman loj xtramp xindxab ni rniabee laa reeman güün reeman ni rënman.

Xhienaag gac ree bejn dxej ni bigra ree

3 Rayal tëë gagbeel Timoteo guial dxej ni bigra ni zëëd ree, dád nawëëg gacan par ree bejn guial guiban reeman. ²Din bejn ree, par laagajc reeman güün reeman xgab, ganaxzi milia güün reeman xgab, abi' güün reeman benro', ganax ree diidxdxal guiniee reeman, guinieeguijdx reeman Dios con ree bejn. Ad zuzoobtri xtiidx ree xdad reeman o xniaa reeman, achetri yayuladx reeman, ad zidxga'tri reeman ni naj por Dios, ³ad zëntri reeman ad zaya tëëtri reeman bejn ree. Ganax diidx rusquiee guiniee reeman bejn ree, ad zucwëëzt güün reeman ni dxuudx ree, dád bèn nayaaladx gac reeman, abi' guidxe'ch reeman ni naj zagdxe. ⁴Yayü reeman laagajc ree bèn ni rajp laa reeman confians, sin guialrdxeb guiniee reeman xhietëëz ni gui't guijc reeman, dád guilies xvalor reeman, mazri ma güün reeman ni rëntzi reeman guial loj zi'c rën Dios. ⁵Gulüü guial dád benyadoo naj reeman, per ni'quid zaliladxt reeman xguialrniabee Dios.

Ad guchajguil bèn ni naj ree zian. ⁶Din loj reeman no'ch bèn ni ru ree lidx ree bejn, abi' rüjn reeman gan béngunaa ni naban ree con gadxagayaa ree dol, con

gadxagayaa ree xgab ni ad rüjnt sirv, tibrajtzi rlliladx reeman laa reeman ⁷béngunaa guin ree zianczi rusiid reeman, per ad ragbeetczy reeman ni diidxli. ⁸Gulal bén ni brii ree laj Janes con Jambres been xcontr reeman Moisejs. Yan ziangajc naj ree bén ni za' ree contr ni naj diidxli, laa reeman ma guxin xquiarguejn reeman, ad zinaltri reeman zi'c rayal chililadx reeman. ⁹Per ad xchejt güün reeman zian, din gra ree bejn gagbee guial rusquiee reeman zi'c goc con Janes në Jambres.

**Rniabee Pab sudxi'ch Timoteo
loj ni basiidaman**

¹⁰Per lüj Timoteo, ragbeel zagdx xhie rulün bejn ree, xhienaag nabanan, xhienaag naj da xgaban, xhienaag rlliladxan, xhienaag ra'pan pacens, xhienaag rënan bejn ree, xhienaag rdaanan, ¹¹xhie ma been ree bejn naj, xhie tëë ree guialzi ma gudëëdan. Lüj ragbee xhienaag guza'can luguiedx Antioquía, Iconio con Listra. Dád ma guzaagdiajn por gra ni ma been ree bejn naj, per Dios babëë naj loj gra ree guialrzagdiaj guin. ¹²Abi' dunuj ree rayagbee guial gra ree bén ni rën guiban zi'c rën Dios guialrlliladx reeman Jesucrist, naj sagdiaj reeman por ni güün ree bejn laa reeman. ¹³Per ree ben mal con ree bén rusquiee, zi'cri zinal reeman nejz mal, rusquiee reeman bejn ree rusquiee tëë laagajc reeman.

¹⁴Per lüj basnuu guzudxi'ch loj ni ma basiidil, në loj ni ma rlliladxil, din lüj ragbee chu ree nin basiid lüj. ¹⁵Abi' lüj diizd xindool nünbeel

xtiidx Dios, diidx ni zile' güün lüj yudar gagbeel xhienaag naj perdon ni zëëd por guialrlliladx Jesucrist. ¹⁶Gra ni zëëd loj xtiidx Dios, por Dios zëëdan. Abi' rüjnan sirv par gusiid bejn bejn ree, par gudëë bejn consejw, par guzuxnejz bejn bejn ree, në par gagbee bejn xhienaag rayal guibanman, ¹⁷din gagbee xbejn Dios guidiblagaa din güünman graloj ni naj ni zagdx.

4 Delant loj Dios në delant loj Jesucrist, bén gui't zi'c tijb rey par güünman guialguxtis loj ree bén naban në loj ree bén ma güjt, naj rni lojl, ²gutie'ch xtiidx Dios. Been naguiejn gunee xtiidxaman ad chi yu'tzi mod. Been naguiejn chililadx ree bejn ni rnieel, gudilë ree bén ad ruzoobt diidx, badëë tëë consejw loj ree bejn, balüü reeman sin guial yalenya'l. ³Din zadxin dxej ad zatiëjbt ree bejn gucaagdiajg reeman ni naj diidxli, ma güün reeman zi'ctzi rën reeman, zaguiil reeman zien ree bén gulüü laa reeman ganax ni ruladx reeman gucaagdiajg reeman. ⁴Ad zidxga'tri reeman ni naj diidxli, mazri ma guidxga' reeman ni rbëëgujic ree bejn. ⁵Per lüj Timoteo, gubajn nadëdguien, gudaan xhietëëz guialrzagdiaj tädil, gutie'ch xtiidxza'c Jesucrist, been mandad ni banee Dios lojl güünl.

⁶Din naj zamer gugüjt reeman naj, ma zidbig guialgüjt par naj. ⁷Ma guzudxi'chan loj xtiidx Dios majsi guza'can ni guza'ctzan, ma gulox benan ni rayal günan abi' ad basa'tnan ni rlliladxan. ⁸Yan prem ni rayalan ma cabëzan naj, prem ni gunee Dad Jesucrist

lon chi guidxin dxej, bén rüjn guialguxtis zi'c rayal. Abi' ad lotzan guneeman prem guin, në loj gra ree bén yu' luxdoo nix cabèz reeman laaman.

Ni rayal güün Timoteo

⁹Been naguiejn diob guidganajl naj, ¹⁰din Demas ma guro'nladxaman naj guial mazri ruladxaman ni yu' ree loj guidxliuj, zeel zëman niz Tesalónica. Abi' Crescente ma zëman niz Galacia guiáad Tito zëman niz Dalmacia. ¹¹Tijbzi Lujc za' con naj. Chi gui'til tanë Marcw din zile' güünx yudar guitie'chix xtiidx Dios. ¹²Tíquico ma guxhalan laaman luguiedx Éfeso. ¹³Chi gui'til tanë da cajpan ni basa'nan luguiedx Troas lidx Carpo, në ree da libran tanë ad yayanladx tëël guidnël da gui'ch reen.

¹⁴Lejandr bén naj herrer, dád zien ree ni mal ma beenman naj, per con Dios yaguijxaman gra ni beenman. ¹⁵Gojp cudad con laaman, din laaman dád rüjn xcontraman ni ranee ree.

¹⁶Yaloj chi guzun loj ree guxtis achutczí been naj yudar, graczi reeman guro'nladx naj. Gagnë Dios ad zidxga'taman ni been reeman. ¹⁷Per Dad Jesucrist been naj yudar banee tëëman naj gojl persi baloox gutiechan xtiidxaman, persi biguiejn ree gra ree bén ad najt bén Israel laan. Zian baslaa Dios naj, zi'c rliaa tijb bejn loj beedx. ¹⁸Abi' Dad Jesucrist, laaman yabëë naj loj gra ni mal, laaman guinia naj xt chi guidxin dxej guidxinan lod canabeeman xanyabaa. iPar laaman naj respejt gra tiamp në zianczi! Amén.

Diidx bigra ca loj gui'ch guie

¹⁹Bagajpdioz Prisca në Aquila në ree xfamil Onesíforo. ²⁰Erasto baya'nman Corinto, guiáad Trófimo ragxuuman basa'nan laaman luguiedx Mileto. ²¹Been naguiejn guda chi gad tiamp nayaag gui't. Eubulo, Pudente, Lino, Claudia në los demasri ree bén rliladx Jesucrist rugajpdioz reeman lüj.

²²Dad Jesucrist gagnë lüj, abi' Dios güünle' gradi. Amén.